

新唐書

冊三

唐書卷十五

宋 翰 林 學 士 歐 陽 修 撰

禮樂志第五

皇后歲祀一季春吉巳享先蠶遂以親桑散齋三日於後殿致齋一日於正寢
一日於正殿前一日尙舍設御幄於正殿西序及室中俱東向致齋之日晝漏
上水一刻尙儀版奏請中嚴尙服帥司仗布侍衛司賓引內命婦陪位六尙以
下各服其服詣後殿奉迎尙儀版奏外辦土水二刻皇后服鈿釵禮衣結佩乘
輿出自西房華蓋警蹕皇后卽御坐六尙以下侍衛一刻頃尙儀前跪奏稱尙
儀妾姓言請降就齋室皇后降坐乘輿入室散齋之日內侍帥內命婦之吉者
使蠶於蠶室諸預享者皆齋前享三日尙舍直長設大次於外壝東門之內道
北南向命婦及六尙以下次於其後俱南向守宮設外命婦次大長公主長公
主公主以下於南壝之外道西三公夫人以下在其南重行異位東向北上陳
饌幔於內壝東門之外道南北向前享二日大樂令設宮縣之樂於壇南內壝

之內諸女工各位於縣後右校爲采桑壇於壇南二十步所方三丈高五尺四出陞尙舍量施帷障於外壇之外四面開門其東門足容厭翟車前享一日內謁者設御位於壇之東南西向望瘞位於西南當瘞堦西向亞獻終獻位於內壇東門之內道南執事者位於其後重行異位西向北上典正位於壇下一位於東南西向一位於西南東向女史各陪其後司贊位於樂縣東北掌贊二人在南差退西面又設司贊掌贊位於堦堦西南東面南上典樂舉麾位於壇上南陞之西東向司樂位於北縣之間當壇北向內命婦位於終獻之南絕位重行異位西向北上外命婦位於中壇南門之外大長公主以下於道東東西當內命婦差退太夫人以下於道西去道遠近如公主重行異位相向北上又設御采桑位於壇上東向內命婦采桑位於壇下當御位東南北向西上執御鉤筐者位於內命婦之西少南西上內外命婦執鉤筐者位各於其采桑位之後設門外位享官於東壇之外道南從享內命婦於享官之東北面西上從享外命婦於南壇之外道西如設次設酒尊之位於壇上東南隅北向西上御洗於

壇南陞東南亞獻之洗又於東南俱北向幣筐於壇上尊坫之所晡後內謁者帥其屬以尊坫疊洗筐冪入設於位升壇者自東陞享日未明十五刻太官令帥宰人以鸞刀割牲祝史以豆取毛血置於饌所遂烹牲五刻司設升設先蠶氏神座於壇上北方南向前享一日金吾奏請外命婦等應集壇所者聽夜行其應采桑者四人各有女侍者進筐鉤載之而行其日未明四刻搥一鼓爲一嚴二刻搥二鼓爲再嚴尙儀版奏請中嚴一刻搥三鼓爲三嚴司賓引內命婦入立於庭重行西面北上六尙以下詣室奉迎尙服負寶內僕進厭翟車於閣外尙儀版奏外辦馭者執轡皇后服鞠衣乘輿以出華蓋侍衛警蹕內命婦從出門皇后升車尙功進鉤司製進筐載之內命婦及六尙等乘車從諸翊駕之官皆乘馬駕動警蹕不鳴鼓角內命婦宮人以次從其日三刻尙儀及司醢帥其屬入實尊疊及幣太官令實諸籩豆簠簋俎等內謁者帥其屬詣廚奉饌入設於饌幔內駕將至女相者引享官內典引引外命婦俱就門外位駕至大次門外迴車南向尙儀進車前跪奏稱尙儀妾姓言請降車皇后降車乘輿之大

次華蓋繖扇尙儀以祝版進御署出奠於坫尙功司製進受鉤筐以退典贊引
亞獻及從享內命婦俱就門外位司贊帥掌贊先入就位女相者引尙儀典正
及女史祝史與女執尊壘筐罍者入自東門當壇南北向西上司贊曰再拜掌
贊承傳尙儀以下皆再拜就位司樂帥女工人入典贊引亞獻終獻女相者引
執事者司賓引內命婦內典引引外命婦入就位皇后停大次半刻頃司言引
尙宮立於大次門外當門北向尙儀版奏外辦皇后出次入自東門至版位西
向立尙宮曰再拜皇后再拜司贊曰衆官再拜在位者皆再拜尙宮曰有司謹
具請行事樂三成尙宮曰再拜皇后再拜司贊曰衆官再拜在位者皆再拜壇
上尙儀跪取幣於篚興立於尊所皇后自壇南陞升北面立尙儀奉幣東向進
皇后受幣進北向跪奠於神座少退再拜降自南陞復于位初內外命婦拜訖
女祝史奉毛血之豆立於內壝東門之外皇后已奠幣乃奉毛血入升自南陞
尙儀迎引於壇上進跪奠於神座前皇后既升奠幣司膳出帥女進饌者奉饌
陳於內壝東門之外皇后既降復位司膳引饌入至階女祝史跪徹毛血之豆

降自東陛以出饌升自南陛尙儀迎引於壇上設於神座前皇后詣盥洗尙儀跪取匱興沃水司言跪取盤興承水皇后盥司言跪取巾於匱進以悅受巾跪奠於匱乃取爵於匱興進受爵尙儀酌盥水司言奉盤皇后洗爵司言授巾皆如初皇后升自壇南陛詣酒尊尙儀贊酌醴齊進先蠶氏神座前北向跪奠爵興少退立尙儀持版進於神座之右東面跪讀祝文皇后再拜尙儀以爵酌上尊福酒西向進皇后再拜受爵跪祭酒啐酒奠爵興尙儀帥女進饌者持籩俎進神前三牲胙肉各置一俎又以籩取稷黍飯共置一籩尙儀以飯籩胙俎西向以次進皇后每受以授左右乃跪取爵遂飲卒爵興再拜降自南陛復于位初皇后獻將畢典贊引貴妃詣盥洗盥手洗爵自東陛升壇酌盎齊于象尊進神座前北向跪奠爵興少退再拜尙儀以爵酌福酒進貴妃再拜受爵跪祭遂飲卒爵再拜降自東陛復位昭儀終獻如亞獻尙儀進神座前跪徹豆司贊曰賜胙掌唱曰衆官再拜在位者皆再拜尙宮曰再拜皇后再拜司贊曰衆官再拜在位者皆再拜尙宮請就望瘞位司贊帥掌贊就瘞堦西南位皇后至望瘞

位西向立尙儀執筐進神座前取幣自北陞降壇西行詣瘞堦以幣置於堦司贊曰可瘞堦東西各四人實土半堦尙宮曰禮畢請就采桑位尙宮引皇后詣

采桑壇升自西陞東向立初皇后將詣望瘞位司賓引內外命婦采桑者執鉤

筐者皆就位

內外命婦一品各二人二品三品各一人

皇后既至尙功奉金鉤自北陞升進典製奉

筐從升皇后受鉤采桑典製以筐受之皇后采三條止尙功前受鉤典製以筐俱退皇后初采桑典製等各以鉤授內外命婦皇后采桑訖內外命婦以次采女史執筐者受之內外命婦一品采五條二品采九條止典製等受鉤與執筐者退復位司賓各引內外命婦采桑者以從至蠶室尙功以桑授蠶母蠶母切之以授婕妤食蠶灑一簣止尙儀曰禮畢尙宮引皇后還大次內外命婦各還其次尙儀典正以下俱復執事位司贊曰再拜尙儀以下皆再拜出女工人以次出其祝版燔於齊所車駕還宮之明日內外命婦設會於正殿如元會之儀命曰勞酒其有司歲所常祀者十有三立春後丑日祀風師立夏後申日祀雨師立秋後辰日祀靈星立冬後亥日祀司中司命司人司祿季夏土王之日祭

中書孟冬祭司寒皆一獻祝稱天子謹遣其中春中秋釋奠于文宣王武成王
皆以上丁上戊國學以祭酒司業博士三獻樂以軒縣前享一日奉禮郎設三
獻位于東門之內道北執事位於道南皆西向北上學官館官位於縣東當執
事西南南向學生位於館官之後皆重行北上觀者位於南門之內道之左右
重行北面相對爲首設三獻門外位於東門之外道南執事位於其後每等異
位北向西上館官學官位於三獻東南北向西上設先聖神坐於廟室內西楹
間東向先師於先聖東北南向其餘弟子及二十一賢以次東陳南向西上其
餘皆如常祀皇子束脩束帛一筐五匹酒一壺二斗脩一案五脗其日平明皇

子服學生之服

其服青衿

至學門外博士公服執事者引立學堂東階上西面相者

引皇子立於門東西面陳束帛筐壺酒脯案於皇子西南當門北向重行西上

將命者出立門西東面曰敢請就事皇子少進曰某方受業於先生敢請見將

命者入告博士曰某也不德請皇子無辱

若已封王則云請王無辱

將命者出告皇子固請

博士曰某也不德請皇子就位某敢見將命者出告皇子曰某不敢以視賓客

請終賜見將命者入告博士曰某辭不得命敢不從將命者出告執篚者以篚東面授皇子皇子執篚博士降俟于東階下西面相者引皇子執事者奉壺酒脩案以從皇子入門而左詣西階之南東面奉酒脩者立於皇子西南東面北上皇子跪奠篚再拜博士答再拜皇子還避遂進跪取篚相者引皇子進博士前東面授幣奉壺酒脩案者從奠於博士前博士受幣執事者取酒脩幣以東相者引皇子立於階間近南北面奉酒脩者出皇子拜訖相者引皇子出其學生束帛酒脩以見如皇子武德二年始詔國子學立周公孔子廟七年高祖釋奠焉以周公爲先聖孔子配九年封孔子之後爲褒聖侯貞觀二年左僕射房玄齡博士朱子奢建言周公尼父俱聖人然釋奠於學以夫子也大業以前皆孔子爲先聖顏回爲先師乃罷周公升孔子爲先聖以顏回配四年詔州縣學皆作孔子廟十一年詔尊孔子爲宣父作廟於兗州給戶二十以奉之十四年太宗觀釋奠於國子學詔祭酒孔穎達講孝經二十一年詔左丘明卜子夏公羊高穀梁赤伏勝高堂生戴聖毛萇孔安國劉向鄭衆賈逵杜子春馬融盧植

鄭康成服虔何休王肅王弼杜預范甯二十二人皆以配享而尼父廟學官自祭之祝曰博士某昭告于先聖州縣之釋奠亦以博士祭中書侍郎許敬宗等奏禮學官釋奠于其先師鄭氏謂詩書禮樂之官也四時之學將習其道故釋奠各以其師而不及先聖惟春秋合樂則天子視學有司總祭先聖先師秦漢釋奠無文魏則以太常行事晉宋以學官主祭且國學樂以軒縣尊俎須於官非臣下所可專也請國學釋奠以祭酒司業博士爲三獻辭稱皇帝謹遣州學以刺史上佐博士三獻縣學以令丞主簿若尉三獻如社祭給明衣會皇太子釋奠自爲初獻以祭酒張後胤亞獻光州刺史攝司業趙弘智終獻永徽中復以周公爲先聖孔子爲先師顏回左丘明以降皆從祀顯慶二年太尉長孫無忌等言禮釋奠于其先師若禮有高堂生樂有制氏詩有毛公書有伏生又禮始立學釋奠于先聖鄭氏註若周公孔子也故貞觀以夫子爲先聖衆儒爲先師且周公作禮樂當同王者之祀乃以周公配武王而孔子爲先聖總章元年太子弘釋奠于學贈顏回爲太子少師曾參少保咸亨元年詔州縣皆營孔子

廟武后天授元年封周公爲褒德王孔子爲隆道公神龍元年以鄒魯百戶爲隆道公采邑以奉歲祀子孫世襲褒聖侯睿宗太極元年以兗州隆道公近祠戶三十供灑掃加贈顏回太子太師曾參太子太保皆配享玄宗開元七年皇太子齒胄於學謁先聖詔宋璟亞獻蘇頌終獻臨享天子思齒胄義乃詔三獻皆用胄子祀先聖如釋奠右散騎常侍褚无量講孝經禮記文王世子篇明年司業李元瓘奏先聖廟爲十哲象以先師顏子配則配象當坐今乃立侍餘弟子列象廟堂不豫享而范甯等皆從祀請釋奠十哲享於上而圖七十子於壁曾參以孝受經於夫子請享之如二十二賢乃詔十哲爲坐象悉豫祀曾參特爲之象坐亞之圖七十子及二十二賢於廟壁二十七年詔夫子旣稱先聖可諡曰文宣王遣三公持節冊命以其嗣爲文宣公任州長史代代勿絕先時孔廟以周公南面而夫子坐西墉下貞觀中廢周公祭而夫子位未改至是二京國子監天下州縣夫子始皆南向以顏淵配贈諸弟子爵公侯子淵兗公子騫費侯伯牛鄆侯仲弓薛侯子有徐侯子路衛侯子我齊侯子貢黎侯子游吳侯

子夏魏侯又贈曾參以降六十七人參成伯顓孫師陳伯澹臺滅明江伯宓子
賤單伯原憲原伯公冶長莒伯南宮适郟伯公皙哀郟伯曾點宿伯顏路杞伯
商瞿蒙伯高柴共伯漆雕開滕伯公伯寮任伯司馬牛向伯樊遲樊伯有若卜
伯公西赤邵伯巫馬期鄆伯梁鱣梁伯顏柳蕭伯冉儒郛伯曹卹豐伯伯虔鄒
伯公孫龍黃伯冉季產東平伯秦子南少梁伯漆雕斂武城伯顏子驕琅邪伯
漆雕徒父須句伯壤駟赤北徵伯商澤睢陽伯石作蜀郕邑伯任不齊任城伯
公夏首亢父伯公良孺東牟伯后處營丘伯秦開彭衙伯奚容箴下邳伯公肩
定新田伯顏襄臨沂伯鄒單銅鞮伯句井疆淇陽伯罕父黑乘丘伯秦商上洛
伯申黨召陵伯公祖子之期思伯榮子旗雩婁伯縣成鉅野伯左人郢臨淄伯
燕伋漁陽伯鄭子徒滎陽伯秦非汧陽伯施常乘氏伯顏嚙朱虛伯步叔乘淳
于伯顏之僕東武伯原亢籍萊蕪伯樂欽昌平伯廉潔莒父伯顏何開陽伯叔
仲會瑕丘伯狄黑臨濟伯邾婁平陸伯孔忠汶陽伯公西與如重丘伯公西蒧
祝阿伯於是二京之祭牲太牢樂宮縣舞六佾矣州縣之牲以少牢而無樂二

十八年詔春秋二仲上丁以三公攝事若會大祀則用中丁州縣之祭上丁上元元年肅宗以歲旱罷中小祀而文宣之祭至仲秋猶祠之於太學永泰二年八月脩國學祠堂成祭酒蕭昕始奏釋奠宰相元載杜鴻漸李抱玉及常參官六軍將軍就觀焉自復二京惟正會之樂用宮縣郊廟之享登歌而已文武二舞亦不能具至是魚朝恩典監事乃奏宮縣於論堂而雜以教坊工伎貞元九年季冬貢舉人謁先師日與親享廟同有司言上丁釋奠與大祠同即用中丁乃更用日謁於學元和九年禮部奏貢舉人謁先師自是不復行矣開元十九年始置太公尚父廟以留侯張良配中春中秋上戊祭之牲樂之制如文宣出師命將發日引辭于廟仍以古名將十人爲十哲配享天寶六載詔諸州武舉人上省先謁太公廟乾元元年太常少卿于休烈奏秋享漢祖廟旁無侍臣而太公乃以張良配子房生漢初佐高祖定天下時不與太公接古配食廟庭皆其佐命太公人臣也誼無配享請以張良配漢祖廟上元元年尊太公爲武成王祭典與文宣王比以歷代良將爲十哲象坐侍秦武安君白起漢淮陰侯韓

信蜀丞相諸葛亮唐尚書右僕射衛國公李靖司空英國公李勣列於左漢太子少傅張良齊大司馬田穰苴吳將軍孫武魏西河守吳起燕昌國君樂毅列於右以良爲配後罷中祀遂不祭建中三年禮儀使顏真卿奏治武成廟請如月令春秋釋奠其追封以王宜用諸侯之數樂奏軒縣詔史館考定可配享者列古今名將凡六十四人圖形焉越相國范蠡齊將孫臏趙信平君廉頗秦將王翦漢相國平陽侯曹參左丞相絳侯周勃前將軍北平太守李廣大司馬冠軍侯霍去病後漢太傅高密侯鄧禹左將軍膠東侯賈復執金吾雍奴侯寇恂伏波將軍新息侯馬援太尉槐里侯皇甫嵩魏征東將軍晉陽侯張遼蜀前將軍漢壽亭侯關羽吳偏將軍南郡太守周瑜丞相婁侯陸遜晉征南大將軍南城侯羊祜撫軍大將軍襄陽侯王濬東晉車騎將軍康樂公謝玄前燕太宰錄尚書太原王慕容恪宋司空武陵公檀道濟梁太尉永寧郡公王僧辯北齊尚書右僕射燕郡公慕容紹宗周大冢宰齊王宇文憲隋上柱國新義公韓擒虎柱國太平公史萬歲唐右武侯大將軍鄂國公尉遲敬德右武衛大將軍邢國

公蘇定方右武衛大將軍同中書門下平章事韓國公張仁亶兵部尚書同中書門下三品中山公王峻夏官尚書同中書門下三品朔方大總管王孝傑齊相管仲安平君田單趙馬服君趙奢大將軍武安君李牧漢梁王彭越太尉條侯周亞夫大將軍長平侯衛青後將軍營平侯趙充國後漢大司馬廣平侯吳漢征西大將軍夏陽侯馮異建威大將軍好時侯耿弇太尉新豐侯段熲魏太尉鄧艾蜀車騎將軍西鄉侯張飛吳武威將軍南郡太守孱陵侯呂蒙大司馬荊州牧陸抗晉鎮南大將軍當陽侯杜預太尉長沙公陶侃前秦丞相王猛後魏太尉北平王長孫嵩宋征虜將軍王鎮惡陳司空南平公吳明徹北齊右丞相咸陽王斛律光周太傅大宗伯燕國公于謹右僕射鄴國公韋孝寬隋司空尚書令越國公楊素右武侯大將軍宋國公賀若弼唐司空河間郡王孝恭禮部尚書聞喜公裴行儉兵部尚書同中書門下三品代國公郭元振朔方節度使兼御史大夫張齊丘太尉中書令尚父汾陽郡王郭子儀貞元二年刑部尚書關播奏太公古稱大賢下乃置亞聖義有未安而仲尼十哲皆當時弟子今

以異時名將列之弟子非類也請但用古今名將配享去亞聖十哲之名自是
唯享武成王及留侯而諸將不復祭矣四年兵部侍郎李紆言開元中太公廟
以張良配以太常卿少卿三獻祝文曰皇帝遣某敢昭告至上元元年贈太公
以王爵祭典同文宣有司遂以太尉獻祝版親署夫太公周之太師張良漢之
少傅今至尊屈禮於臣佐神何敢歆且文宣百世所宗故樂以宮縣獻以太尉
尊師崇道也太公述作止六韜勳業著一代請祝辭不進署改昭告爲敬祭留
侯爲致祭獻官用太常卿以下百官議之多請如紆言左司郎中嚴況等議曰
按紆援典訓尊卑之節當矣抑猶有未盡夫大名徽號不容虛美而太公兵權
奇計之人耳當殷之失德諸侯歸周遂爲佐命祀典不云乎法施於人則祀之
如仲尼祖述堯舜憲章文武刪詩書定禮樂使君君臣臣父子子皆宗之法
施於人矣貞觀中以太公兵家者流始令磻溪立廟開元漸著上戊釋奠禮其
進不薄矣上元之際執事者苟意於兵遂封王爵號擬文宣彼於聖人非倫也
謂宜去武成王號復爲太公廟奠享之制如紆請刑部員外郎陸淳等議曰武

成王殷臣也紂暴不諫而佐周傾之夫尊道者師其人使天下之人入是廟登是堂稽其人思其道則立節死義之士安所奮乎聖人宗堯舜賢夷齊不法桓文不贊伊尹殆謂此也武成之名與文宣偶非不刊之典也臣愚謂罷上元追封立廟復礪溪祠有司以時事得矣左領軍大將軍令狐建等二十四人議曰兵革未靖宜右武以起忠烈今特貶損非勸也且追王爵以時祠爲武教主文武並宗典禮已久改之非也乃詔以將軍爲獻官餘用紓奏自是以上將軍大將軍將軍爲三獻其五岳四鎮歲一祭各以五郊迎氣日祭之東岳岱山於兗州東鎮沂山於沂州南岳衡山於衡荆南鎮會稽於越州中岳嵩高於河南西岳華山於華州西鎮吳山於隴州北岳恆山於定州北鎮醫無閭於營州東海於萊州淮於唐州南海於廣州江於益州西海及河於同州北海及濟於河南